

ligiosis, d. d. 7 Septembris 1909, *De quibusdam postulantibus in Religiosas Familias non admittendis*, ad mulierum quoque Religiosas Familias in posterum extendantur. Ideoque, absque speciali venia Sedis Apostolicae et sub poena nullitatis professionis, non excipiantur sive ad Novitiatum, sive ad emissionem votorum, postulantes:

1. ° quae, propria culpa, e collegiis etiam laicis, gravi de causa, expulsae fuerint;

2. ° quae a scholis domesticis, in quibus puellae speciali cura in spem amplectendae vitae religiosae educantur, quacumque ratione dimissae fuerint;

3. ° quae, sive ut professae, sive ut novitiae, ab alio Ordine vel Congregatione religiosa dimissae fuerint; vel, si professae, dispensationem votorum obtinuerint;

4. ° quae iam admissae, sive ut professae, sive ut novitiae in unam provinciam alicuius Ordinis vel Congregationis et ab ea dimissae, in eandem vel in aliam eiusdem Ordinis vel Congregationis provinciam recipi nitantur.

Contrariis quibuscumque non obstantibus.

Romae, 4 Ianuarii 1910.

Fr. J. C. CARD. VIVES, *Praefectus*.

L. © S.

D. L. Janssens O. S. B., *Secretarius*.

## S. CONGREGATIO RITUUM

### I.

#### DECRETUM

#### AURELIANEN.

Beatorum Coelitem honoribus inclytae Puellae Aurelianensi, Ioannae de Arc Virgini, die decima octava mensis Aprilis, vertentis anni solemniter tributis in Basilica Vaticana, Rmus Pater Franciscus Xaverius Hertzog, Procurator Generalis Societatis Sancti Sulpitii, eius causae Aurelianen. Postulator, fervidis Sacrorum Galliae Antistitum votis obsequens, Officium cum Missa proprium redigendum satagit de festo ipsius Beatae Puellae, in singulis totius Galliae Dioecesisbus Dominica infra Octavam Ascensionis sub ritu duplici maiori, ac duplici secundae classis in Dioecesisbus

Aurelianen., Sancti Deodati, Nanceyen. et Virodunen. itemque in Archidioecesis Rhemen. et Rhotomagen. quotannis recolendo: atque eiusmodi Officii et Missae schema supremae Sanctissimi Domini Nostri Pii Papae X sanctioni humillime subiecit.

Quare, ad iuris tramitem, quum Emus et Rmus Dnus Cardinalis Dominicus Ferrata, Causae Relator, in Ordinariis Sacrorum Rituum Comitibus, subsignata die ad Vaticanum habitis, Officium et Missam in honorem Beatae Ioannae de Arc proposuerit; Emi et Rmi Patres Sacris tuendis Ritibus praepositi, re mature perpensa, auditoque R. P. D. Alexandro Verde, Promotore Sanctae Fidei, rescribendum censuerunt: « Pro gratia, et ad Emum Ponentem cum Promotore Fidei ». Die 24 Aug. 1909.

Tandem revisione peracta exhibiti Officii et Missae, hisque omnibus Sanctissimo Domino Nostro Pio Papae X ab infrascripto Cardinali Sacrorum Rituum Congregationi Praefecto relatis; Sanctitas Sua sententiam Sacri ipsius Consilii ratam habens, de speciali gratia, festum Beatae Ioannae Arcensis Virginis, ab utroque clero, in cunctis Galliae Dioecesisibus Dominica infra Octavam Ascensionis cum suprascriptis Officio et Missa sub ritu duplici maiori, in Dioecesisibus vero Aurelianen., Sancti Deodati, Nanceyen. et Virodunen. itemque in Archidioecesisibus Rhemen. et Rhotomagen. sub ritu duplici secundae classis, quotannis recolendum indulsit: servatis Rubricis. Contrariis non obstantibus quibuscumque. Die 25, iisdem mense et anno.

Fr. S. CARD. MARTINELLI, *Praefectus*.

L. © S.

Philippus Can. Di Fava, *Substitutus*.

OFFICIUM, MISSA ET ELOGIUM BEATAE IOANNAE DE ARC VIRGINIS. ..  
PRO GALLIAE DIOECESIBUS.

DOMINICA INFRA OCTAVAM ASCENSIONIS  
IN FESTO BEATAE IOANNAE DE ARC, VIRG.

*Duplex maius*

(PRO GALLIA)

*Officium de Communi Virginum, praeter sequentia.*

*In I. Vesperis Antiphonae de Laudibus.*

CAPITULUM.

(*Sap. 8, v. 9*).

Proposui sapientiam adducere mihi ad convivendum: sciens, quoniam mecum communicabit de bonis, et erit allocutio cogitationis et tædii mei. Habebo, propter hanc, claritatem ad turbas, et honorem apud seniores iuvenis.

## HYMNUS.

Stat cultrix vigilans pauperis hortuli,  
 Annorum tredecim parvula nil sciens,  
 Primas docta preces, prae sociis pia,  
 Simplex, mitis et innocens.  
 Orantem Michael Angelus edocet,  
 Quam clarae parili lumine virgines,  
 Virtutum meritis conspicuae simul,  
 Crebris alloquiis fovent.  
 Dum voces superas excipit, expavet;  
 Sed, Mens Domino, fortior in dies,  
 Parens imperiis, pro patria libens  
 Castam se vovet hostiam.  
 Mox dulces socias et patriam domum,  
 Et cum matre patrem iussa relinquere,  
 Miles facta Dei, quo vocat Angelus,  
 Fertur nil trepidans eques.  
 Qui terras statuit, gloria sit Patri:  
 Qui gentes redimit, gloria Filio:  
 Sancto Spiritui gloria, qui pias  
 Et fortes animas facit. Amen.

*f.* Meritis et precibus Beatae Ioannae. Alleluia.

R) Propitius esto, Domine, populo tuo. Alleluia.

*Ad Magnificat Ant.* Haec est Ioanna, virgo Aurelianensis: haec, quae multum orat pro populo, et pro universa Gallorum gente. Alleluia.

## ORATIO.

Deus, qui Beatam Ioannam Virginem ad fidem ac patriam tuendam mirabiliter suscitasti: da, quaesumus, eius intercessione; ut Ecclesia tua, hostium superatis insidiis, perpetua pace fruatur. Per Dominum.

*Et fit Comm. Dominicae atque Octavae Ascensionis.*

## AD MATUTINUM.

*Invitatorium.* Regem Virginum Dominum \* Venite, adoremus. Alleluia.

## HYMNUS.

Aureliani turribus  
 Frustra premuntur hostium:  
 Intrat Ioanna: milites  
 Hymnos precesque concinunt.  
 Quam vellet hosti parcere!  
 Hunc voce amica praemonet,  
 Sponte ut recedens, liberum  
 Regnum relinquat Galliae.

Negat, sed agmen gallicum  
Ruit: Ioanna sanguinem  
Profundit, icta vulnere,  
Deusque dat victoriam.  
Urbes et agros occupat;  
Rursus nitescunt Lilia;  
Turmae fugantur hostium;  
Rhemos patescit semita.  
O sancta et una Trinitas,  
Firmans movensque pectora,  
Contra malum certantibus  
Dona vigorem et praemium. Amen.

IN I NOCTURNO.

*Ant.* Elevata est magnificentia Ioannae super coelos. Alleluia.

*V.* Meritis et precibus Beatae Ioannae. Alleluia.

*R).* Propitius esto, Domine, populo tuo. Alleluia.

*Lectioes de Scriptura occurrente, (de Communi, 2° loco « Confitebor » ubi fit Officium ritus dupl. 2. classis).*

*R).* *I.* Deus omnium exauditor est: ipse misit Angelum suum, et tulit me de ovibus patris mei: \* Et unxit me unctione misericordiae suae. Alleluia, alleluia. *f.* Praeparate corda vestra Domino, et servite illi soli, quia misit me in adiutorium vobis. Et unxit.

*R).* *II.* Ego tuli te de domo patris tui, et audire feci tibi vocem meam: \* Fuique tecum in omnibus, ubicumque ambulasti. Alleluia, alleluia. *f.* Feci tibi nomen grande in universo populo tuo, iuxta nomen magnorum, qui sunt in terra. Fuique.

*R).* *III.* Adonai, Domine, Deus magne et mirabilis, qui dedisti salutem in manu feminae: \* Exaudi preces servorum tuorum. Alleluia, alleluia. *f.* Benedictus es, Domine, qui non derelinquis praesumentes de te, et de sua virtute gloriantes humilias. Exaudi. Gloria Patri. Exaudi.

IN II. NOCTURNO.

*Ant.* Propter veritatem et mansuetudinem, et iustitiam deducet te mirabiliter dextera tua. Alleluia.

*f.* Factus est Dominus susceptor meus. Alleluia.

*R).* Et refugium meum in die tribulationis. Alleluia.

*Lectio IV.*

Ioanna de Arc, in oppido Domremensi, olim Dioecesis Tullensis, nunc Sancti Deodati, conspicuis fide et morum integritate parentibus, orta est anno Christi millesimo quadringentesimo duodecimo. Vix tredecim annos habebat, solummodo domestica negotia, opus rusticum, et prima rerum divinarum elementa edocta erat, cum se a Deo electam esse ad monita est, ad Galliam ab

hostibus liberandam, et ad pristinum regnum restituendum. Postquam per quinque annos, Michael Archangelus atque Catharina et Margarita, virgines sanctae, quibus familiariter utebatur, certiozem eam fecerunt, quomodo rem iussam perageret, Deo parendum esse rata, a praefecto Vallis Colorum petiit, et, post nonnullas repulsas, obtinuit, ut viros sibi daret, qui se ad Carolum regem ducerent.

R). IV. Benedicat te Dominus in virtute sua, qui per te ad nihilum redegit inimicos nostros: \* Ut non deficiat laus tua de ore hominum. Alleluia, alleluia. -f. Tu laetitia, tu honorificentia populi nostri, quia nomen tuum ita magnificavit Dominus. Ut non deficiat.

*Lectio V.*

Supernis monitis obtemperans, superatis longi itineris difficultatibus, ad Castrum Cainonense in agro Turonico pervenit, et, Carolo regi facta fide, se a Deo missam esse, in urbem Aureliam profecta est. Paucis diebus, terribili impetu, triplicem cladem hostibus inflixit, castella expugnavit, suumque sustulit vexillum. Inde, post alia bellica facta, in quibus mirum in modum apparuit auxilium Dei, Rhemos Carolum duxit, ut regia consecratione inungeretur. Nec quiescendum esse censuit: sed cum a coelestibus nuntiis accepisset, se, Deo permittente, in hostium potestatem esse venturam, libenti animo, quae fieri necesse esset, suscepit.

y. V. Ornauerunt faciem templi coronis aureis, unxerunt regem et ascendentes laeti dixerunt: Vivat rex. \* Et facta est laetitia magna in populo. Alleluia, alleluia. y. In hymnis et confessionibus benedicebant Dominum, qui per manum feminae fecit victoriam. Et facta est.

*Lectio VI.*

Capta Ioanna in civitate Compendio, et hostibus pretio tradita, Rothomagus mox ducta, cum ibi in ius rapta esset, quamplurimis criminationibus, excepta morum castitate, fuit obnoxia; sed omnia pro Iesu patienter toleravit. Acta per corruptissimos iudices causa, innocens et mitis virgo damnata est poena combustionis. Igitur Sacra Eucharistia, quam tamdiu desideraverat, refecta, oculis ad crucem conversis, nomen Iesu saepissime ingeminans, ad coelum evolavit die trigesima maii, nondum expleta aetatis suae anno vigesimo. Romana Ecclesia, quam semper dilexerat, et ad quam saepius provocaverat, eam ab omni crimine vindicandam, Callisto tertio, Summo Pontifice, curavit. Vergente in finem saeculo undevicesimo, Leo decimo tertius, Aurelianensis puellae causam introduci permisit. Postremo Pius Decimus, re diligentissime examinata, Ioannam de Arc, recentibus clarum miraculis, in Beatorum numerum retulit, ac Officium et Missam propriam toti Galliae, de speciali gratia, benigne indulsit.

R). IV. Puella mea, noli timere, quia ego tecum sum, dicit Dominus: \* Si transieris per ignem, flamma non nocebit animae tuae, et ego glorificabo

eam. Alleluia, alleluia. *-f.* Mittam tibi Angelum meum, et in medio flammae laudabis nomen meum. Si transieris. Gloria Patri. Si transieris.

## IN III. NOCTURNO.

*Ant.* Confessio et pulchritudo in conspectu eius, sanctitas et magnificentia in sanctificatione eius. Alleluia.

*f.* Posuisti, Domine, super caput eius. Alleluia.

R). Coronam de lapide pretioso. Alleluia.

Lectio Sancti Evangelii secundum Matthaeum (*cap. 16*).

*Lectio VII.*

In illo tempore: Dixit Iesus discipulis suis: Si quis vult post me venire, abneget semetipsum, et tollat crucem suam et sequatur me. Et reliqua.

Homilia Sancti Hilarii Episcopi (*Canon. 16, 17*).

O beatum damnum et iactura felix! ditescere nos Dominus detrimento animae et corporis voluit, et esse sui similes hortatur: quia ipse in figura Dei constitutus, usque ad mortem humilis et obediens factus, principatus potestatis totius, quae in Deo est, accepit. Sequendus igitur est cruce assumpta, et passionis suae si non sorte, attamen voluntate comitandus est. Quid enim prodest occupasse mundum, et toto terrenae potestatis dominatu opibus saeculi incubare, si perdenda anima et suscipiendum vitae detrimentum est?

R). *VII.* Exaudiat Dominus orationem puellae suae, qua oravit pro nobis, ut reconcilietur nobiscum Deus: \* Fac, Domine, ut maneat Nomen sanctum tuum in terra nostra. Alleluia, alleluia. *f.* Respice, Domine, et visita populum tuum, ne deficiat in eo Hostia et Sacrificium. Fac, Domine.

*Lectio VIII.*

Quae autem commutatio pro anima, cum fuerit amissa, quaeretur? Cum Angelis enim Christus aderit, reddens singulis, ut merebuntur. Quid offeremus ad vitam? Praeparatos credo terrenarum opum futuris commerciis thesauros, ambitiosos dignitatum famaeque titulos, aut veteres delegatae nobilitatis imagines? Neganda sunt haec omnia, ut melioribus abundemus: et contemptu universorum Christus sequendus est, et aeternitas spiritualium, terrenorum est damno comparanda.

R). *VIII.* Domine, praevenisti eam in benedictionibus dulcedinis: \* Posuisti in capite eius coronam de lapide pretioso. Alleluia, alleluia. *f.* Quia minas iudicum non timuit, nec terrenae dignitatis gloriam quaesivit, sed ad coelestia regna pervenit. Posuisti. Gloria Patri. Posuisti.

*Lectio IX de Homilia Dominicae.*

Te Deum.

## AD LAUDES ET PER HORAS.

*Ant. I.* Ecce Ioanna, virgo simplex et piissima, quoniam timebat Dominum valde, nec erat, qui loqueretur de illa verbum malum. Alleluia.



AD TERTIAM.

*Ant.* Suscitavit. -

*Capitulum.* Proposui, *uti in Laudibus.*

R), *br.* Meritis et precibus Beatae Ioannae \* Alleluia, alleluia.

*f.* Propitius esto, Domine, populo tuo. Alleluia, alleluia.

Gloria Patri. Meritis.

*f.* Factus est Dominus susceptor meus. Alleluja.

R). Et refugium meum in die tribulationis. Alleluja.

AD SEXTAM.

*Ant.* Stetit.

*Capitulum.* \ (Sap. 8, v. 12).

Tacentem me sustinebunt, et loquentem me respicient, et sermocinantem me plura, manus ori suo imponent.

R), *br.* Factus est Dominus susceptor meus. \* Alleluja, alleluja.

*f.* Et refugium meum in die tribulationis. Alleluia, alleluia.

Gloria Patri. Factus est.

*f.* Posuisti, Domine, super caput eius. Alleluia.

R). Coronam de lapide pretioso. Alleluia, alleluia.

AD NONAM.

*Ant.* Custodivit.

*Capitulum.* (Sap. 8, v. 13).

Habebo, per hanc, immortalitatem, et memoriam aeternam his, qui post me futuri sunt, relinquam.

R), *br.* Posuisti, Domine, super caput eius. \* Alleluia, Alleluia.

*f.* Coronam de lapide pretioso. Alleluia, alleluia.

Gloria Patri. Posuisti.

*f.* Magna est gloria eius in salutari tuo. Alleluia.

R). Gloriam et magnum decorem impones super eam. Alleluia.

IN II. VESPERIS.

*Omnia, ut in primis, praeter sequ.*

HYMNUS.

Salve, virilis pectoris  
Virgo, Patrona Galliae!  
Tormenta dira sustinens,  
Christi refers imaginem.  
Voces supernas audiens,  
Iesu repleta lumine,  
Dum fata pandis patriae,  
Silent paventque iudices.



*Acta Apostolicae Sedis. - Commentarium Officiale.*

Oppressa flammis, clamitas  
Iesum, crucemque fortiter  
Amplexa, ad Ipsum, simplicis  
Instar columbae, pervolas.  
Choris beatis Virginum  
Adscripta, cives adiuva:  
Te deprecante, singulis  
Detur corona gloriae.  
Sit laus Patri, sit Filio:  
Sancto decus Paraclito,  
Qui corda amore sauciat,  
Vires et auget languidis. Amen.

*f.* Meritis et precibus Beatae Ioannae. Alleluia.

*R.* Propitius esto, Domine, populo tuo. Alleluia.

*Ad Magnificat. Ant.* Ioanna, sponsa Christi, tutrix et custos patriae, esto tuis famulis murus inexpugnabilis assiduis suffragiis. Alleluia.

*Quando hoc festum alicubi transferri contigerit extra Tempus Paschale, in tribus Nocturnis dicuntur sequentes Antiphonae; demptis etiam Alleluia in RR). et ff.*

IN I. NOCTURNO.

*Ant. 1.* Elevata est magnificentia Ioannae super coelos.

*Ant. 2.* Veni electa mea et ponam te in thronum meum, quia concupivit Rex speciem tuam.

*Ant. 3.* Accepit benedictionem a Domino, et misericordiam a Deo salutari suo.

IN II. NOCTURNO.

*Ant. 1.* Propter veritatem et mansuetudinem, et iustitiam deducet te mirabiliter dextera tua.

*Ant. 2.* Arcum conteret, et confringet arma, et scuta comburet igni.

*Ant. 3.* Iustitia et misericordia plena est dextera tua.

IN III. NOCTURNO.

*Ant. 1.* Confessio et pulchritudo in conspectu eius, sanctitas et magnificentia in sanctificatione eius.

*Ant. 2.* Annuntiaverunt coeli iustitiam eius, et viderunt omnes populi gloriam eius.

*Ant. 3.* Iudicavit in iustitia, et populos in aequitate.

*Lectio IX, quando legenda sit, erit sequens:*

Grave onus infirmitati humanae imposuerat, ut cum sensum vitae homines ex vivendi affectu habere coepissent, fructum eius, qui praesens corporibus blandiebatur, amitterent; negarentque se sibi, id est, quod esse coepissent, esse se

nollent: cum sensus huius exordium ex affectu voluntatis habuissent. Opus ergo erat veri ac manifesti exempli auctoritate, ut contra vim sensumque iudicii, optabile fieret praesentium damnum, lucro deinceps non ambiguo futurorum. Igitur postquam et tollendam crucem, et perdendam animam, et damno mundi commutandam vitae aeternitatem monuerat, conversus ad discipulos, ait: Quosdam ex his futuros, qui gustaturi mortem non essent, donec filium nominis in regni sui gloria contuerentur.

## MISSA.

*Introitus.**(Exodi 15).*

Cantemus Domino: gloriose enim magnificatus est. Fortitudo mea et laus mea Dominus, et factus est mihi in salutem. Alleluia, alleluia.

*Ps. 97.* Cantate Domino canticum novum, quia mirabilia fecit. *f.* Gloria Patri.

## ORATIO.

Deus, qui Beatam Ioannam Virginem ad fidem ac patriam tuendam mirabiliter suscitasti: da, quaesumus, eius intercessione; ut Ecclesia tua, hostium superatis insidiis, perpetua pace fruatur. Per Dominum.

*Et fit Comm. Dominicae atque Octavae.*

## Lectio libri Sapientiae.

*(Sap. c. 8).*

Proposui sapientiam adducere mihi ad convivendum; sciens, quoniam mecum communicabit de bonis, et erit allocutio cogitationis et taedii mei. Habebo propter hanc, claritatem ad turbas, et honorem apud seniores iuvenis: et acutus inveniar in iudicio, et in conspectu potentium admirabilis ero, et facies principum mirabuntur me. Tacentem me sustinebunt, et loquentem me respicient, et sermocinante me plura, manus ori suo imponent. Praeterea habebō, per hanc, immortalitatem, et memoriam aeternam his, qui post me futuri sunt, relinquam. Disponam populos, et nationes mihi erunt subditae. Timebunt me audientes reges horrendi. In multitudine videbor bonus, et in bello fortis.

Alleluia, alleluia.

*-f. (Iudith. 15).* Fecisti viriliter et confortatum est cor tuum. Manus Domini confortavit te, et ideo eris benedicta in aeternum. Alleluia.

*f. (ibidem 8).* Nunc ergo ora pro nobis, quoniam mulier sancta es et timens Deum. Alleluia.

*Extra Tempus Paschale.*

*Graduale. (Iudic. 5).* Nova bella elegit Dominus, et portas hostium ipse subvertit.

*(ibid. ).* Ubi collisi sunt currus et hostium suffocatus est exercitus, ibi narrentur iustitiae Domini, et clementia eius in fortes Israel.

Alleluia, alleluia.

*f. (Judith. 13).* Laudate Dominum Deum nostrum, qui non deseruit sperantes in se, et in me, ancilla sua, adimplevit misericordiam suam, quam promisit domui Israel. Alleluia. \*

X Sequentia Sancti Evangelii secundum Matthaemum (*Matth. 16*).

In illo tempore: Dixit Iesus discipulis suis: Si quis vult post me venire, abneget semetipsum, et tollat crucem suam, et sequatur me. Qui enim voluerit animam suam salvam facere, perdet eam: qui autem perdiderit animam suam propter me, inveniet eam. Quid enim prodest homini, si mundum universum lucretur, animae vero suae detrimentum patiatur? Aut quam dabit homo commutationem pro anima sua? Filius enim hominis venturus est in gloria Patris sui cum angelis suis: et tunc reddet unicuique secundum opera eius.

*Offertorium. (Judith 15).* Benedixerunt eam omnes, una voce dicentes: Tu gloria Ierusalem, tu laetitia Israel, tu honorificentia populi nostri. Alleluia.

SECRETA.

Haec Hostia salutaris, Domine, illam nobis in rebus arduis conferat fortitudinem, cuius Beata Ioanna, sub tanta discriminum varietate, tam insignia praebuit exempla; ut, ad inimicos repellendos, etiam belli pericula subire non dubitaverit. Per Dominum.

*Communio (Ps. 22).* Si ambulavero in medio umbrae mortis, non timebo mala, quoniam tu mecum es, Domine Iesu. Alleluia.

POSTCOMMUNIO.

Coelesti pane refectos, qui toties Beatam Ioannam aluit ad victoriam: praesta, quaesumus, omnipotens Deus; ut hoc salutis alimentum de inimicis nostris victores nos efficiat. Per Dominum.

*Evangelium Dominicae in fine.*

### *PRO SINGULIS GALLIAE MARTYROLOGIIS.*

DIE XXX MAII.

Rothomagi Ioannae Virginis Arcensis, Puellae Aurelianensis nuncupatae, a Pio Decimo Coelitem Catalogo adscriptae, cuius festum in tota Gallia, de speciali gratia, Dominica infra Octavam Ascensionis quotannis recolitur.

DOMINICA INFRA OCTAVAM ASCENSIONIS.

Officium Beatae Ioannae Virginis Arcensis, cuius Natalis die trigesima Maii recolitur.